

A'ij ti tira'uyú'uxaca'a í San Pablo a'íjna í Timoteo, í ti seij

A'íjna yu'uxari jetze pu rateújte'e

¹ Inee, i nej i'i Pablo, nee nu ne'ín pú'een seij ti ravaire'e a'íjna í Ciríistu'u ti ajta Jesús pú'een. Ayee pu éeni'ici'e na'antíhuau a'iné ayée pu tinaata'a'íj í Dios ti tu'irájtuaa, ajta í Ciríistu'u ti ajta i'i Jesús, í tej rajchú'eve'e.

² Ayee nu yé tí'imuayu'use'e mú'ee, Timoteo, pej piyen nemuari yee niyauj a'iné mú'ee pej pajta piyen che'atá pena'a tzáahuatl'ira'a rá'astijre'e í tavástar'a netíj inee. Ayee nu tí'ijhuahuau mú'eetzi jime'e ti a'ín í Dios í ti tá'iya'upua, ajta a'ín í Ciríistu'u ti ajta Jesús í i'i tavástar'a, miché'e me'ín rí'i timuaacha'íj muá'ara'ani, miché'e majta muá'ancu'uvajxi'in, miché'e majta rí'i mu'uhuáruuren í á'a tzajta'a.

Jíme'en í mej hua'itzi jín tí'imua'ata

³ Netí'ij ne'uun aumé'ecaa u Macedonia, ayée nu timuaatáhuaviiri'i pej pe'uun a'uteáuran a'ujna Éfeso. Neajtahua'a nu niyen tí'imuahuvii pej pe'uun a'uteáuran pej pi piyen tihua'utá'ijmii í se-ica í teteca mej mi caí ché'e miyen tihua'amua'ate me'íjna jime'e í niuucari ti hua'itzi jín namuajre'e.

⁴ Mata'aj caí ché'e me'íjna namuajra a'ij mej ti'itíj tihua'a'ixaate'e me'íjna jime'e a'ij metiteejnéj í huáacixa'astemua'ame'en. Cu xiee mecaí ja'anáj ra'antipua'ajte'esin mej miyen raataxáj yee a'ii pu

a'ñin pú'een ti ayén huanéj í seíj jetze, ajta í seíj, seíj pu ajta jetzen huanéj asta mena'a caí e'ará'asti í Dios jemi. Naíjmi'i t'íj na'a, ayée pu'u tí'ivaire'e mej mi huateújne'usi'ite'en í teite me'íjna jime'e í mej caí a'ij tirú'umua'aree. Capu ti'it'íj vaire'e mej mi raanaíjmire'en a'ij ti tí'ijxe'eve'e í Dios. Tí'ij ja'at'í ayén raanaíjmire'en, ayée pu tiú'ujxe'eve'e ti a'ñin ja'at'í ayén tirá'antzaahuate'en í Dios.

⁵ Ayee tu een jín tí'imua'ijcate'e mej mi huaújxe'eve'en seíj majta seíj me'íjna jime'e í mej urar'í'en í ru tzajta'a, majta í mej r'í'í mé titeumuámua'arejme, majta í mej tzáahuati'ira'a jín rá'astijre'e í tavástar'a.

⁶ Seica mú meri ya'uhuá'axi mej miyen 'eene'e. A'íj mú jín autéjhuui mej miyen tiu'utaxáj me'íjna jime'e í niuucari ti caí ti'it'íj vaire'e.

⁷ Ayee mú tí'ijxe'eve'e mej te'enteárute me'íjna jime'e mej tihua'umua'aten a'ij ti huataújmua'a í niuucari í mej jín tí'aijta ti Moises ra'uyú'uxaca'a. Mí majta a'íime, camu a'atzu yaú'itie a'ij mej ti'ixa. Camu majta ramua'aree a'ij ti een me'íjna jime'e í mej jín miyen raataxáj yee ayée pu ti'ayajna.

⁸ Teen tu ramua'aree ti tí'ivaire'e a'íjna í niuucari í mej jín tí'aijta, Moises ti ra'uyú'uxaca'a. Tí ij ayén ti'itéva'irihua'an, ayée pu ruxe'eve'e mej nain jín ra'ará'astijre'en a'ij ti tiú'ujxe'eve'e.

⁹ Teajta, tiyen tí'ijmua'aree tíjñ ayée mú een jín ra'uyú'uxaca'a a'íjna í niuucari í mej jín tí'aijta mej mi hua'utá'ijm'í a'ímej í mej a'ij pua'a titetiújcha'íí. Camu me'íjna jín hua'utá'ijm'íjra a'ímej í mej r'í'í mé titeumuámua'aree í ru tzajta'a. A'íime mú

xaa me'íjna jín hua'utá'ijmíjra í mej caí ranamua-jracu a'ij ti tirá'axa í niuucari í mej jín tí'ajta, majta a'ímej í mej caí rá'astijre'e a'ij ti tí'ijxe'eve'e í Dios. Majta seica, a'ii mú a'ín pú'een í mej rá'axieehuari'i í hua'aye'ira, majta a'íme í mej a'ij pua'a titetiújcha'íi, majta a'íme í mej rutáàta cui'íca, na'ari runáàna, ja'atí ti na'a ti tí'itecui'íca.

¹⁰ Ayee mú majta í niuucari jín hua'utá'ijmíjra a'ímej í mej xána'acira'a 'úucate jemi, majta a'ímej í mej che'atá mena'a xána'acira'a huá'a jamuan í tí'irí ca'ín huá'a jamuan seica í teteca. Ayee mú che'atá seica me'íjna jín í niuucari hua'utá'ijmíjra a'ímej í mej seica vivi'i mej mi tihua'umuáriste'en ca'anéeri jime'e, majta a'ímej í mej tí'ihua'itaca, majta a'ín í mej tí'itecuanamujca. Tí'itíj ti na'a ti caí naa 'een, ti seicié 'een, a'í mú hua'utá'ijmíjra me'íjna jime'e í niuucari í mej jín tí'ajta, tí'itíj ti na'a mej caí ranamujracu í niuucari ti rí'i tiú'uruure í tiú'utzajta'a.

¹¹ A'íjna i niuucari ti rí'i tiú'uruure, a'í pu a'íjna jín ayén tirá'axa a'ij ti tí'iraxa í niuucari ti naa namujre'e, ti ajta jín Dios tu'irájtuaani. Ajta a'ín Dios, a'í pu a'íjna jín tinaa'íjca ineetzi nej ni ti-hua'utá'íxaate'en ne'íjna jime'e í niuucari. A'íj nu jín rí'i tiraatá'asin í Dios.

A'í pu tí'ijteujtzi'ire'e a'íjna jime'e ti Dios rá'ancu'uvajxi

¹² Jé'ecan nu tí'ijteujtzi'ire'e ne'íjna í Círístu'u ti ajta íi Jesús í tavástar'a í nej jetzen aránca'ane. Ayee nu een jín tí'ijteujtzi'ire'e a'iné ayée pu tirá'amitíejte'eca'a nej caí tí'itíj jín auté'ítze. A'í pu na'antíhuau ineetzi nej ni raatévaire'en.

13 Jéjcuá ìmuá nu a'ij pua'a tí'ixaxa'ata'a í Dios jemi, neajta a'ij pua'a huá'aruurejca'a a'ímej í mej rá'astijre'e í tavástar'a. Jéihua nu huá'ane'usi'íte'eca'a. Aru capu amín a'ij, Dios pu ná'ancu'uvajxi a'íjna jime'e nej caí ramua'areereca'a a'ij nej rijca, neajta caí té'atzaahuat'e'eca'a.

14 Jéihua pu huápi'i rí'i tinéjcha'íi já'araa í tavástar'a. A'íi pu ajta ayén naatá'a nej ni rá'antzaahua ne'íjna í Ciríistu'u ti ajta ayén ántehuaa tijín Jesús. Ayee pu ajta naatá'a nej ni raxí'eve'e ná'ara'ani.

15 Ayee nu tí'imua'ixaate'e tzáahuati'ira'a jime'e ti ayén ti'ayajna ti a'íjna jín mú pa'uvé'emej íiyen chaanaca japua a'íjna í Ciríistu'u ti ajta i'i Jesús tí'ij a'ín hua'irájtuaani a'ímej í mej a'ij pua'a titetiújcha'íi. Ché'e caí ja'atí ayén tí'ixajta yee capu ayén ti'ayajna. Nee nu ramua'aree a'iné nee nu ne'ín pú'een i nej jaítze'e a'ij pua'a ti'itíncha'íica'a caí máàj ja'atí.

16 A'íj pu jín Dios ná'ancu'uvajxi ineetzi i nej a'ín pú'een í nej jaítze'e a'ij pua'a ti'itíncha'íica'a tí'ij a'ín Ciríistu'u ti ajta i'i Jesús tihua'utasejrate'en í teite a'ij ti een jime'e í Ciríistu'u raayí'iti ti ja'atí tiu'utá'uuni'i nain jime'e tíj na'a ti a'ij pua'a een. A'íi pu ayén tí'ijxe'eve'eca'a mej mi miyen raasej a'ímej í mej rá'antzaahuat'enche'e mej mi me'uun a'uteáuran jemin ruurican tíj na'a rusén jime'e.

17 A'íj pu jín, ayén tiú'ujxe'eve'e tej rí'i tiraatá'an tíj na'a rusén jime'e, teajta tiraatateújtzi'ire'en te'íjna ti Tajtuhuan jín ti'itéjvee, ti caí ja'anáj rupu-ata'atan, ti ajta caí ja'anáj mi'ini, í tej caí ja'anáj

rasej taj'i jime'e. A'ii pu a'ín pú'een í ti a'íi na'a caj ti'iDioj.

18 Niyauj, mi pej i'i Timoteo, ayée nu tí'imua'ixaate'e a'íjna jime'e í mej amuacaícan á jemi tiu'utaxájtaca'a a'ímej í mej tí'ixaxa'ata'a í Dios jetze me'ecan. Patá'aj piyen tiu'utatése'en temua'a naa pe'íjna jime'e í pej jín tí'ivaire'e í tavástar'a jemi.

19 Patá'aj pauj té'atzaahuate'e, pajta mú'ee rí'i tí'ití'á'acha'íi puá'ara'ani í a'atzajta'a tí'ij caí a'uun huatasej're'en tí'ití'j ti tiu'utévi'iraste'e. Seica mú meri mé rúhua'axi mej té'atzaahuate'eca'a, majta, a'íi mú raatéxiehuataca'a mej rí'i té'usej're'ecaa í ru tzajta'a. Ayee mú jín huarín, nain pu e'ehuaújpua'arixi í mej jín té'atzaahuate'eca'a.

20 A'ímej jemi nu tí'ixa í mej hua'apua, a'íjna í Himeneo, ajta a'íjna í Alejandro. A'ímej nu neri tiu'utátui í Satanás jemi mej mi ráamua'ati mej caí ché'e a'ij pua'a tiraatá'an í tavástar'a a'íjna jime'e a'ij mej ríci.

2

Jíme'en a'ij mej ye'í se'j huatéjniuuni

1-2 Ayee pu tiná'amitiejte'e ti ayén ruxe'eve'e sej si siyen huárini. Setá'aj naíjmi'ica jín huatéjniuuni. A'íj xu jín siyen tiraatáhuavii, seajta siyen huá'a jemi huatéjniuuni, seajta tíhua'ateújtzi'ire naíjmi'ica jemi, a'ímej í mej Tajtuhuan jín títeté'u'upu'u, majta a'ímej í mej tí'aijta. Ayee xu huárini tej ti rí'i yee tí'itechejca, teajta ra'ará'astén

í taye'irá jime'e, teajta rí'i tirájcha'íi tá'ara'ani í tavástar'a t'í'ij caí ja'atí tájaaxiejte'e.

³⁻⁴ Ayee pu tiraavíjte'e sej si siyen huárini. Ayee pu tira'aráanajche a'ame í Dios ti tu'irájtuaa, a'iné a'íi pu ayén tí'ijxe'eve'e ti naíjmi'ica huirájtuaani, mej mi ráamua'aree nain tíj na'a ti ayén ti'ayajna a'íjna jemi.

⁵ Ayee pu'u tí'een, a'iné seij pu'u í Dios, ajta seij pu'u a'íi pú'een ti huá'a japua huániuuni í teite í mej jín auteájturaa í Dios jemi. Ajta pu teáata'a pírici. A'ii pu a'íin pú'een í Ciríistu'u ti ajta i'i Jesús.

⁶ A'íi pu huataújmuai'ivejritaca'a t'í'ij a'íin tiu'utanájchita nain jime'e í mej jín auteájturaa í teite í Dios jemi. A'ii pu a'íin pú'een a'íjna ti Dios tihua'utá'ixaa á jéjre'e, a'atzaj ti pua'a raaxí'epi'intare.

⁷ Mí neajta inee, a'íj pu jín na'antíhuau nej ni tihua'utá'ixaate'en í teite ne'íjna jime'e nej ni tiu'utévair'e'en í Dios jemi. Ayee nu tí'imua'ixaate'e tzáahuati'ira'a jime'e. Canu tí'ihua'i. Nee nu xaa tihua'amua'ate a'ímej í mej té'atzaahuate'e í tavástar'a jemi, neajta tihua'utá'ixaate'esin tzáahuati'ira'a jime'e a'ímej í mej majta Israél jetze ajtéme'ecan.

⁸ A'íj nu jín niyen tí'ijxe'eve'e matíj mena'a a'úu mej a'ucaíjme'e, miché'e huatéjniuuni í Dios jemi, miyen rí'i tite'urarí'eene'en í ru tzajta'a majta caí níniu'ucacu, majta caí rújaaxiéevi'ira.

⁹ Ajta a'íime í 'uuca, ayée nu che'atá tí'ijxe'eve'e mej mi miyen tí'itechejca a'ij ti tiraavíjte'e, miché'e miyen caí tí'itechejca me'íjna jime'e ti tiu'utévi'iraste'e sino me'íjna jime'e ti caí

a'ij pua'a tihua'asejrate'e. Miché'e caí ayée mena'a teva'ujhua'atehua'an í rucipuá jetze a'ijna jime'e ti huápi'i tí'ijnajche, miché'e majta caí ayée mena'a te'ucarújte'ejmé'en cumu ti'itíj oro ti ti'ipu'éene'ejmee, miché'e majta caí huápi'i ayée mena'a te'ecamuátzi'ivi'ijmé'e me'ijna jime'e ti'itíj perla, nusu mecaí ayée mena'a ti'iteújche'etehua'an me'ijna jime'e í cáxuri ti huápi'i tí'ijnajche.

¹⁰ Miché'e miyen huárini í 'uuca mej mi seica miyen ráamua'areere mej rí'i tí'iteteite. Miché'e miyen tiú'uruuren a'ij ti tí'ixi'epi'in, a'iné ayée pu tihua'uvíjte'e a'imej í 'uuca í mej miyen tiú'ujsejrata mej miyen rá'astijre'e í Dios jemi.

¹¹ Ayee pu ruxe'eve'e a'imej jemi í mej 'uuca mej mi ráari'iren miyen ti'inamuáara, majta miyen tihua'ará'astijre'en í teteca.

¹² Canu hua'atá'aca a'imej í 'uuca mej mi ti-huá'umua'aten u teyujta'a í teteca, ni mej majta tíhua'uta'aíjte'en. Ruxe'eve'e ti a'ín 'íta'a a'uun teyujta'a caí avé'eniucca'an.

¹³ Ayee pu'u tí'een, a'iné Dios pu amuacaícan Adán huatétaahuaca'a. Ajta á'iyen a'ín Eva huatétaahuaca'a.

¹⁴ Ajta, a'ín Adán, a'í pu ramua'areereca'a a'ij ti rijcaa tí'ij auteájturaa í Dios jemi. Capu ja'atí ráacuanamua. Mí ajta a'ín Eva, Satanás pu xaa ráacuanamua. A'ij pu jín a'aturáa já'araa í Dios jemi.

¹⁵ Aru Dios pu hua'irátuaasin a'imej í 'uuca mat'ij a'íme tiyaúumua'a muá'ara'ani ti pua'a miyen á'ateeren mej té'atzaahuate'e, majta mej rí'i ti-huá'ajcha'í í seica. Majta mej urarí'enejme'eni í

ru tzajta'a me'íjna jime'e mej miyen huárini a'ij ti tiraavíjte'e.

3

Jime'en a'ij mej ye'í huárini a'íme í mej t'íajta teyujta'a

¹ Ayej xaa ne'u ti'ayajna a'íjna i niuucari. Tí pua'a ja'atí ayén raxí'eve'e ti a'ín antiújmua'areere a'íjna jime'e ti hua'acha'í í mej e'etiújse'íri u teyujta'a, a'í pu xaa raxí'eve'e ti tiu'umuári'ihua ti il'í xí'epi'in.

² A'íj pu jín, ayén ruxe'eve'e ti ayén éene'en a'íjna ti ayén antiújmua'aree a'íjna jime'e ti hua'acha'í. Ruxe'eve'e ti caí ti'itíj jín a'aturáa mej mi caí a'ij pua'a tí'ixajta í teite, ajta ti se'j na'a neiche. Ajta ayén ruxe'eve'e ti rí'í ti'itiújcha'í, ti c'ij na'a ti'iy'e'eca í ti'itíj nahuáj, ajta ti caí tiú'ujxajtav'e, mej mi rí'í tiraatá'an í teite. Ajta ayén ruxe'eve'e ti hua'ancuré'evi'itin temua'a naa a'ímej í mej ramuáaren a'ájna ti é'eche, ajta ti raayí'itihua'an ti tihua'umua'aten temua'a naa.

³ Ajta ayén ruxe'eve'e ti caí rutahua'íve'e, ajta ti caí runé'use'eve'e, sino ti rí'í tejá'ucati a'ímej jemi í teite, ajta ti caí ti'itíj jín tí'ijaaxiejta. Ayee pu ajta ruxe'eve'e ti caí ramuájche'e í tumin ti ramuá'itici.

⁴ Ayee pu ruxe'eve'e ti raayí'itihua'an ti tihua'uta'aíjte'en temua'a naa a'ímej í mej jemin é'eche, ajta í yaújmua'ame'en. Ayee pu che'atá na'a ruxe'eve'e mej ra'ará'asten a'ij ti tiraavíjte'e.

⁵ Ayee pu tí'een, a'iné ti pua'a caí raayí'itihua'an ti tihua'uta'aíjte'en a'ímej í mej jemin é'eche, capu a'ij tí'iri'iri ti huá'ucha'ín a'ímej í mej a'uun

e'etiújse'iri í teyujta'a mej mi tiraatateújtzi'ire'en í Dios.

⁶ Ruxe'eve'e ti ari á'atee ti té'antzaahua. Na'ari caí, a'íi pu a'ujtzaahuat'e'en a'íjna jíme'e ti ve'ecán jín ti'itéjvee. Tí pua'a ayén té'ujtzaahuat'e,e, Dios pu ayén che'atá tí'ijxi'epi'íntare'en a'ij ti ari tiraaxí'epi'íntare í tiyaaru'u jemi.

⁷ Ajta ayén ruxe'eve'e mej jemin ramua'areere ti ríi tí'ítevij a'íime í mej caí té'atzaahuat'e. Na'ari caí, seica mú ra'utéxiehuari'ira, ajta a'íin tiyaaru'u, a'íi pu jíme'en ayén tiraatémua'íti.

A'ij mej ye'í huárini a'íime í mej tí'ivaire'e u teyujta'a

⁸ Jíme'en a'íime í mej tí'ivaire'e u teyujta'a, ayée pu ruxe'eve'e mej miyen ríi mé tité'ujjuhua'ane'en mej caí tí'ihua'ita, mej mi rá'antzaahuat'e'en í teite. Ajta ayén ruxe'eve'e mej caí jei'hua raye'eca tí'itíj nahuáj, majta mej caí ramuájche'e í tumin mej ramuá'itici a'íjna jíme'e mej huá'ucuanamua í seica.

⁹ Ayee pu ajta ruxe'eve'e mej nain jín té'atzaahuat'e'en a'íjna ti rú'avaataca'a í Dios jemi, a'ij ti tiú'uruu í tavástar'a. Jé'ecan pu ruxe'eve'e mej miyen tirú'umua'areere í ru tzajta'a ti ayén tí'ayajna.

¹⁰ Tí pua'a miyen tí'ijxe'eve'e mej mi tiu'utévaire'en u teyujta'a, a'íi pu ruxe'eve'e mej me'ín teite amuacaícan miyen tiraaxí'epi'íntare'en a'ímej jemi í mej tí'ivaire'ecu. Tí pua'a caí tí'itíj a'ij tihuá'aturaate'e, aj pu ri'iríista a'ame mej miyen tiu'utévaire'en.

¹¹ Ayee pu che'atá na'a tí'een a'ímej jemi í 'uuca í mej huajá'uvi'itin. Jé'ecan pu ruxe'eve'e mej

miyen rí'i mé tité'ujujhua'ane'en. Ruxe'eve'e mej caí a'ij pua'a tiú'ujxajtave'e, majta caí rutá'aruaijve'e, mej caí ti'itíj jín até'itze'ara'an.

¹² Majta a'íime í mej tí'ivaire'e u teyujta'a, ayée pu ruxe'eve'e ti seíj na'a neiche, ajta ti raayí'tihua'an ti temua'a naa tíhua'uta'aíjte'en í ruyaujmua'a, ajta a'ímej í seica í rute'itestemua'a.

¹³ Tí pua'a seíj rí'i tiu'utévaire'en u teyujta'a, ayée pu raamuá'itín mej rí'i tiraatá'an í teite me'íjna jime'e ti rí'i tiu'utévai. Ajta pu Dios raatáca'anisti'ire'esin ti ij auj tí'ivaire'e, ajta caí tí'itziíne'e a'iné a'íi pu té'aste a'íjna í Círístu'u jemi ti ajta i'i Jesús.

Jíme'en í niuucari ti jé'iyecan jín namuajre'e, ti ajta titaataseíjrate í Dios

¹⁴⁻¹⁵ Jíi, nej tí'imuyu'use'e, ayée nu tí'ijxe'eve'e nej ca'anacan ne'uun a'utevéé ná'ara'ani mú'eetzi jemi. Aru ti pua'a ná'ateevi'in niyájna, ayée nu tí'ijxe'eve'e pej ráamua'aree a'ij mej ti'itíj jín huárini a'íime í teitestemua'ame'en í Dios, a'íime í mej e'etiújse'iri u teyujta'a mej mi tiraatateújtzi'ire'en me'íjna í Dios ti i'irúuri. A'ii mú a'ín pú'een í mej tíhuá'a'ixaate'e í niuucari ti ayén ti'ayajna í Dios jemi. Majta a'íime, camu taúra'aca mej seicié tíhua'utémuaitín.

¹⁶ Jee xaa ne'u, ayée pu ti'ayajna, capu hua'itzi na'a. Huáp'i pu muári'eri ti ja'atí ráamua'ati a'íjna ti rú'avaa í Dios jemi, í tej jín tiyen tí'iy'e'ira, a'iné ayée pu tiuju'uríj:

A'íi pu ayén huataseíjre tehuá'ira'acan jime'e.

Ajta a'ín xiéjniu'ucare'ara'an í Dios,

a'íi pu ayén té'axajtaca'a

ti ayén ti'ayajna í Círístu'u jemi.
 Majta a'íime í mej ta japua tí'ivaire'e, a'íi mú
 raaseíj.
 Majta a'íime í teitejra'a
 mej yen huachéjme íiyen chaanaca japua,
 seica mú miyen tihua'utá'ixaa a'íj ti a'íin
 huaríj.
 Majta a'íime í mej yen huachéjme íiyen chaanaca
 japua,
 mu'íití mú té'antzaahua a'íjna jemi.
 Ajta Dios pu ya'uví'iti í ta japua
 ti ij a'uun nain jín antiújmua'areere á'ara'ani.

4

*Jíme'en a'ímej í mej raatéxãeehuatá muá'aju'u mej
 mi cáí ché'e té'atzaahuat'e'en*

¹ Ajta a'íin xiéjniu'ucare'ara'an í Dios, a'íi pu ayén
 ti'ixa e'ehuauritiécan jíme'e ti nu'u ayén té'eme
 méjca'ihua yee tí'ij te'entipúa'arijme'en. Seica mú
 nu'u yá'uhua'axíjsin í mej té'atzaahuat'e. A'íime
 mú nu'u namuaara muá'aju'u í xiéjniu'ucari í mej
 tihua'ahuaitze'e, majta mú ranamuajran a'ij ti
 a'íin tiyaaru'u tihua'amua'aten.

² A'íj pu jín ayén huataseíjre'esin mej miyen
 hua'ítzi jín tihua'amua'aten me'íjna jíme'e a'íime
 í mej tí'ihua'itaca, í majta a'ij pua'a titetiújcha'íi.
 Capu rí'írí ti ja'atí hua'utatévi'imua'an. A'iné camu
 miyen ríci a'ij mej tirú'umua'aree í ru tzajta'a ti
 ayén tiraavíjte'e, cu xíee tiyaaru'u pu huá'ataixí'í
 í hua'amu'úu jetze.

³ A'íi mú hua'utá'ijmíjra í teite mej cáí
 huateneíchen, mej cáí huatéviche'en. Majta
 miyen tihua'uta'aíjte'esin mej cáí ráacua'ani

ti'itíj ti tí'icua'irili. Aru a'ín Dios, nain pu yen tiu'uteájtuaa mej mi ra'ancuré'an í teite í mej té'atzaahuate'e, majta ramua'aree ti'itíj ti ayén ti'ayajna, mej mi me'íjna jín tiraatateújtzi'ire'en.

⁴⁻⁵ A'iné temua'a pu ti'irí'een naíjmi'i tíj na'a ti Dios tiú'utaahuaca'a, capu ayén tiraavíjte'e ti ja'atí ti'itíj mé úrieni sino ché'e a'ín ra'ancuré'an. Ché'e ajta a'íjna jín tiraatateújtzi'ire'en í Dios jemi, a'iné pu'uri a'uun e'avíitzi'ire'e í Dios jemi a'íjna jime'e ti a'ín Dios ari ayén tiu'utátuiire'esin tí'ij huatéjniuuni í Dios jemi.

Jíme'en a'íjna ti temua'a naa tí'ivaire'e í Jesús jemi

⁶ Patá'aj piyen tihua'utá'an mej mi ráamua'ati í a'ihuáamua'a a'íjna i nej neri muaatá'ixaa. Tí pua'a piyen huárini, temua'a pej tiu'utévaire'esin í Ciríistu'u jemi ti ajta i'í Jesús. Petiu'utévaire'esin pe'íjna jime'e tíj na'a pej pá'arí'istaca'a, mú'ee pej ranamuájraca'a í niuucari pej jetzen té'antzaahua, í niuucari í mej temua'a naa timuaamuá'ate.

⁷ Capej rá'atzaahuate'e a'íjna í niuucari ti caí Dios jemi é'eme'ecan, ti'itíj mej tí'imuarita ti caí ayén ti'ayajna, ti caí ti'itíj vaire'e. Patá'aj piyen ámu'a'ate pe'íjna jime'e pej piyen huárini a'ij ti tí'ijxe'eve'e í Dios.

⁸ Cíj pu caj tí'ivaire'e ti pua'a piyen huá'acua'ajte'en pe'íjna jime'e pej raatá'an í a'atzajta'a pej pi huaté'aca'ane í mua'atévira'a jetze. Aru tí'ivaire'e tíj na'a naíjmi'íca ti pua'a piyen ámu'a'ate pe'íjna jime'e pej piyen huárini a'ij ti tí'ijxe'eve'e í Dios. Tí'ivaire'e íjii pej yen huateáuran íiyen chaanaca japua, ajta

timuaatéva'ire pej pi ruuri puá'ara'ani tíj na'a rusén jime'e.

⁹ Ayee nu tí'imua'ixaate'e tzáahuati'ira'a jime'e ti ayén ti'ayajna. Ché'e caí ja'atí ayén seicié tí'ixajta.

¹⁰ Ayee tu een jín tí'imijhuaca, teajta tí'itese'eca'a tej tiyen raachú'eve'en tel'ijna jemi í Dios ti i'irúuri, ti ajta rí'i tihua'atá'aca naíjmi'ica í teite jaítze'e. A'íi pu ajta hua'irátuaasin a'ímej í mej té'atzaahuate'e.

¹¹ Paúche'e tihuá'amua'ate, pajta pauj tihua'uta'aíjte'en pel'ijna jime'e nej yé tí'imuyayuse'e.

¹² Capej ti'itá'acare'en ti ja'atí muacáxieehuata a'ijna jime'e pej pauj temuaj, sino ayée pepu'u rí'i tejá'uche'ecane'en temua'a naa mej mi a'íime í mej té'atzaahuate'e miyen che'atá mena'a á'ujjhuane'en patíj mú'ee a'ijna jime'e a'ij pej tihuá'ixaate'e, a'ij pej rí'i tí'ití'á'acha'íi, ajta a'ij pej tihuá'axe'eve'e. Miché'e majta miyen che'atá mena'a timuá'ijchue patíj mú'ee a'ijna jime'e a'ij pej tirá'astijre'e í tavástar'a, ajta a'ij pej te'urarí'en í a'atzajta'a.

¹³ Ayee pej rijca asta necaí uvé'enen, patá'aj piyen hua'utánamuajriste'en í yu'uxari jetze í teite tzajta'a, pajta tihua'utá'ixaate'en, pajta tihuá'umua'aten.

¹⁴ Capej raxiéehuata a'ijna ti Dios muaatapuajve mat'íj mej vaujsi mua'ajtamuá'iej, majta tiu'utaxájtaca'a mú'eetzi jime'e í Dios jetze me'ecan.

¹⁵ Patá'aj piyen raruure pel'ijna jime'e, patá'aj nain jín tí'amua'ate mej mi naími'i miyen tiraaseíj pej raanaíjmire'en í ti mú'eetzi jemi huateájturaa.

¹⁶ Rí'i pepu'u pe'íjna jime'e a'ij pej ti'itíj ruure, pajta a'ij pej ti'itíj tihuá'amua'ate. Patá'aj piyen te'utáviicua'i pe'íjna jime'e a'iné ti pua'a piyen huárini, mú'ee pej asej huiirá'atuaasin, pajta hua'irátuaasin a'ímej í mej muánamuajran.

5

A'ij ti ye'í ti'itiújcha'í á'ara'ani a'ímej jemi í mej té'atzaahuate'e

¹ Capej a'ij pua'a ti'ijteá'axi'i seij ti ari vástacira'i, sino rí'i pej tiraatájeeve cumu a'atáata pepu'u. Ajta a'íime í teteca í mej caí xi vaújsicira'i, patá'aj rí'i tihua'utájeeve cumu a'ihuáamua'a pepu'u.

² Patá'aj rí'i tihua'utájeeve í 'uuca í mej meri ucarijse cumu a'anáana pepu'u, majta a'ímej í mej caí xi ucarijse cumu á'acu'utzimua'a pepu'u na'ari á'ajuutzimua'a. Patá'aj rí'i tihua'utájeeve a'ij ti tiraavíjte'e nain jime'e.

³ Ajta a'íime í 'uuca í mej meri huaújseistareca'a, ti pua'a ayén ti'ayajna mej huaújseistareca'a, majta í mej caí a'ij tí'ijviicua'i, patá'aj hua'utévaire'en.

⁴ Na'ari caí, ti pua'a auj tiyaúumua'a ca'ín auj tíye'ecuajmua'a, ayée pej huárini. Miché'e a'íime mí'i rí'i ráaruuren mej me'íjna jín te'ará'asten mej hua'utévaire'en í ruxí'ej teite. Matí'ij miyen huarín, mu'uri xaa tiu'unájchitaca'a me'íjna jime'e í mej té'echa'íca'a ruvaújsimua'a jemi na'ari ruye'ecuajmua'a jemi. Ajta a'ii pu a'ín pú'een í ti rí'i tiratá'aca í Dios.

⁵ Patá'aj piyen huárini, ti pua'a ja'atí xaa huaújseistareca'a, ti ajta caí a'ij tí'ijviicua'i, a'íi pu xaa té'antzaahuate'e í Dios jemi, ajta téniúuve'e

nain xicaj tzajta'a, ajta nain tíca'ari tzajta'a ti 'ij ayén tí'ijhuaviira ti 'ij Dios raatévaire'en.

⁶ Ajta a'ín í 'íta'a ti huaújseistareca'a, ti pua'a ayén rí'i tira'aráanajche a'íjna jime'e ti naa seijre'e jemin, cu xíe ti huamí'i í Dios jemi. Mí ajta, aúche'e pu ruuri.

⁷ Patá'aj pajta hua'utánamuajriste'en í teite pe'íjna í niuucari mej mi caí ti'itíj jín a'aturáa muá'ara'ani, tí'ij ajta caí ja'atí ti'itíj jín huá'a jetze tí'ijpua'ajte'e.

⁸ Tí pua'a ja'atí caí tihua'utévaire'en a'ímej í rute'testemua'a, a'ímej í mej jaítze'e vejli'i jemin é'eche, a'í pu a'íjna jín mé rúurie ti rá'atzaahuaté'eca'a í Dios jemi. Jaítze'e pu a'ij pua'a ríci caí seíj ti a'ij pua'a ti'itíjcha'íi, ti ajta caí ja'anáj rá'atzaahuaté'e.

⁹ Jíme'en a'ímej í mej huaújseistareca'a, a'ímej pepu'u auyú'uxan í mej miyen rájcha'íi a'achú cumu huaícate nine'ira'a o jaítze'e nine'ira'a. Ajta, ayé'e pu ruxe'leve'e ti caí ja'anáj tí'ixana'acire'e jemin í rucín teecan.

¹⁰ Ayee pu ajta ruxe'leve'e, mej naími'i ramua'areere í teite ti pua'a xí'epi'ín huaríj ti'itíj jime'e, ti rí'i tihua'uxá'apuairi'i í tí'iríi ca'ín ti hua'ancuré'evi'iti a'ímej í mej rámuarecare'e nusu ti hua'anája'usixi í huá'íica jetze a'ímej í mej huaté'uu í Dios jemi na'ari ti hua'utévai a'ímej í mej tihua'amuári'eriste'e o ti ayén huataúra'a ti ayén huárini ti'itíj ti a'ij tí'ixi'epi'ín.

¹¹ Ajta a'íime í mej huataújseistareca'a, í mej mauj téemuastaca'a, capej piyen huá'ayu'uxa jetzen í cuapé'e, a'iné tí'ij ari jaítze'e hua'utá'asi mej

huavíche'en, majta caí ché'e raxí'leve'e muá'aju'u mej tiu'utévaire'en í Cirístu'u jemi, a'íí mú xaa huatéviche'esin.

¹² Tí pua'a piyen hua'uyú'uxan í cuapée jetze, ajta ti pua'a miyen huatéviche'en, a'íí mú rajpuaítzi muá'aju'un í Dios jemi a'iné mu'uri ra'utéxieehuari'iri'i í mej amuacaícan jín te'ataújratziiri'i í Dios jemi.

¹³ Ajta a'íjna jime'e, ayée mú tí'ijri'ire mej á'ujujhua'ane'en í huá'achi'i tzajta'a méyee, majta méyee. Ayee mú jín mé'ujujhua'an a'iné ayée mú rici a'ij ti ti'itíj tihua'aráanajche. Ayee mú á'ujujhua'an méyee, majta méyee mej jeíhua tiú'ujxajtave'e, majta jeíhua tiú'urihua'uve'e me'íjna jime'e a'ij ti rici í x'ejra'an tevi. Ajta, ayée te'irájra'ani mej jeíhua tiú'ujxajtave'e ti caí ayén tiraavíjte'e.

¹⁴ Ayee pu tí'irineca a'ímej jemi í mej mauj téemuastaca'a í mej huataújseístareca'a. A'íj nu jín niyen tí'imua'ixaate'e tíjín miché'e huatéviche'en mej mi tiyaúumua'a muá'ara'ani. Miché'e majta rí'i tiu'umuári'en a'u mé'é'eche mej mi caí raatá'an me'íjna ti tájcha'íire'e ti ti'itíj jín huá'a jetze te'ujpuá'ajte'en.

¹⁵ Ayee pu tí'ayajna mej seica meri mé rúurie í mej amuacaícan te'ataújratziiri'i í Dios jemi mej mi ra'ará'asten me'íjna í Satanás.

¹⁶ Ajta a'íin 'íita'a ti ajta té'atzaahuatave'e, ti pua'a á mé'é'eche jemin seica í mej huaújseístareca'a, ché'e a'íin hua'utévaire'en ti ij caí huá'amuari'eriste'e a'ímej í mej tí'ivaire'e u teyujta'a. Tí pua'a ayén huárini, aj pu xaa huatári'iristari a'ímej jemi í mej teyujta'a

tí'ivaire'e mej mi hua'utévaire'en í mej caí a'ij tí'ijviicua'i í mej hua'újseistareca'a.

17 Patá'aj piyen huá'uruuren a'ímej í mej antiújmua'aree u teyujta'a. Tí pua'a xí'epi'in merici, ayée pu tiraavíjte'e pej temua'a r'íi tihua'atá'acare'en ti'itíj jime'e ti tihuá'aturaate'e. Patá'aj jaítze'e r'íi tihua'utá'an a'ímej mej mi'i huateújca'anen me'íjna jime'e mej tihua'utá'ixaate'en, majta mej tihuá'umua'aten.

18 Ayee pej huárini, a'iné ayée pu té'eyu'usi'i í yu'uxari jetze tíjn: “Caxu ra'amua'j'iquihua'an mi puuya ti rayún í triigu ru'íca jime'e sino ché'e ri'iriistan ti cáj caj tiráacua'ani.”

Ajta pu ayén té'eyu'usi'i tíjn: “Ayee pu tiraavíjte'e mej mi tiraaná'jchite'e ja'atí ti tí'imíjhuaca a'achú ti caj tiraamuá'iti.”

19 Tí pua'a ja'atí ti'itíj jín jetzen tí'ijpua'ajte'e seij ti hua'acha'íi u teyujta'a, ti pua'a a'íi na'a tí'ijpua'ajte'e, capej ranamuajra. Aru ti pua'a mé hua'apua na'ari mehua'íca miyen jetzen tí'ijpua'ajte'e, aj pej xaa ráanamua.

20 Majta a'íime í mej hua'acha'íi í teite teyujta'a, ti pua'a a'ij pua'a mé titetiújcha'íi í Dios jemi, patá'aj hua'ajteá'axi'in, meti'inamuá'araca í teite, mej mi ráamua'aree í seica mej mi caí miyen tité'ítzee ti'itíj jime'e ti caí xí'epi'in.

21 Jemin í Dios, neajta jemin í Ciríistu'u ti ajta i'i Jesús, neajta huá'a jemi í mej tí'ivaire'e í ta japua, Dios ti hua'antíhuau, ayée nu tí'imua'ijcate'e patá'aj nain jín na'ará'astijre'en a'ij nej neri timuá'ixaa. Capej ti'itíj jín a'ij rijca pe'íjna jime'e pej seij jaítze'e xe'leve'e, pajta seij caí

piyen tí'ixe'eve'e sino patá'aj piyen che'atá pena'a huá'uruuren naíjmi'ica.

22 Capej a'iyé'itze'e pej ra'avé'emijhua'an seij í ja'atí ti'itíj tí a'ij jíme'en pej pí caí jamuan auteáturan í Dios jemi. Patá'aj asej rí'i tihuá'acha'in patá'aj caí ti'itíj jín auteáturan í Dios jemi, seij jamuan í tevi.

23 Patá'aj raatapuá'ajta pej caí a'íi pena'a jaj ye'eca. Patá'aj cáj caj ti'itíj nahuáj tiu'uyé'en a'iné jeíhua pej tí'icui'i muá'a tzajta'a.

24 A'íjna jíme'e í seica í teteca, á jéjre'e pu seijre'e í mej jín auteájturaa í Dios jemi tí ij amuacaícan puaíjtzi hua'utá'an. Ajta seica jíme'e, capu a'ij ámitieere'e amuacaícan í mej jín auteájturaa í Dios jemi, sino méjca'i huáyee xaa teja'uré'enejsin a'ájna xicáara'an tí jetzen huatasejre'esin.

25 Ayee pu che'atá na'a een a'íjna jíme'e í tí xí'epi'in í mej jín meri tiu'utévai, a'íi pu á jéjre'e seijre'e. Na'ari tí pua'a caí amuacáí ámitieere'e, méjca'i huáyee pu huatasejre'esin. Capu rí'irí tí huateúravaa tíj na'a rusén jíme'e.

6

1 Ayee pu ruxe'eve'e mú'ejmi jemi setíj sena'a pua'amé mej ca'anéeri jín tejá'amuamariste'e tí í ayén tejamuá'amitiejte'e tí ayén raavíjte'e seij hua'ará'astijre'en a'ímej í mej tejá'amua'aíjte'e. Na'ari tí pua'a secaí siyen huárini, a'íi mú a'ij pua'a tiu'utaxájta me'íjna jíme'e í tej tiyen ratamuá'amua tíjín Dios tí ta'ivástara'a, majta me'íjna jíme'e a'ij tej tí'imua'ata.

2 Ajta, a'iné a'íi mú í mej tejá'amua'aíjte'e, a'íi mú majta té'atzaahuat'e, ayée xu

huárini. Caxu huá'axieehuari'ira se'íjna jime'e sej ru'huaamua'a í tavástarara'a jemi, sino ayée xu jaítze'e tihua'utévaire'en. Ayee xu huárini a'iné jaítze'e pu tihuá'aci'iti a'ímej í mej tejá'amua'aijte'e a'íjna jime'e sej siyen tihua'utévaire'en, majta miyen té'atzaahuat'e, ajta Dios pu huá'axe'eve'e. A'ii pu a'ín pú'een í ti ruxe'eve'e pej piyen tihuá'umua'aten. Pajta, patá'aj ca'aníjra'a hua'utá'an mej mi miyen huárini.

Jíme'en í ti tzáahuati'ira'a jín tájcha'íre'e

³⁻⁴ Seica mú miyen tí'imua'ataca me'íjna jime'e ti caí ayén ti'ayajna, ti seicié een a'íjna jime'e í niuucari ti rí'i táaruuren ti jíme'en taamuá'ate í tavástarara'a í Jesús ti ajta i'í Ciríistu'u. Majta miyen tí'imua'ataca a'íjna jime'e ti seicié een a'íjna jime'e í niuucari ti tzáahuati'ira'a jín ti'ixa í Dios jemi. Tí pua'a ja'atí ayén éene'en, capu ti'itíj ú'umua'aree sino á'ujtzaahuat'e pu'u. Jéihua pu tiú'urihua'uve'e nain jime'e, ajta runé'use'eve'e a'íjna jime'e a'ij ti huataújmuua'a seij í niuucari. A'ii pu a'ín pú'een í ti te'iráaye'i ti ayén rici. Muaújchueere'e rujímua'a na'ari muaújtese'e. Majta a'ij pua'a tiú'ujxajtave'e ca'ín sei pu ayén tí'ijxajtzi'i í rux'íej tevi ti ij a'ij pua'a ráaruuren.

⁵ Ja'anáj ti na'a muaújtese'e a'íime í mej a'ij pua'a mé titeumuámua'aree. A'í pu tiyaaru'u tihuá'ari'iri'i í mej amuacaícan jín rú'umua'areereca'a tzáahuati'ira'a jime'e. A'í pu jín ayén tihuá'amitíejte'e mej miyen tiraamuá'itín me'íjna jime'e mej huataújseijrata mej nu'u Ciríistu'u jemi tí'ivaire'e.

6 Mí ajta, ti pua'a ja'atí rí'i huá'uruuren a'ijna jime'e ti rá'astijre'e í Dios, jeíhua pu a'ijna jín raamuá'itin, ti pua'a ajta rutémua'ave'e.

7 A'iné tetí'ij huataseíjre íiyen chaanaca japua, catu ti'itíj uvé'eneijte. Ajta, tetí'ij huirácine tiyánna chaanaca japua, catu ti'itíj á'atini.

8 Ayee pu éene'e, tiché'e huátatemua'ave'en te'ijna jime'e tej tí'ijcha'íi í tej tí'icua'a, ajta í tej jín ti'itétache'ete.

9 Majta a'íime í mej miyen raxí'eve'e mej hu-ateújchijteaanita, ayée mú 'een matí'ij a'íime í ti'itén ja'atí ti caujnari jín hua'utéj'í'ici'e. A'íi pu hua'utánamua í huá'a tzajta'a mej mi jeíhua tí'ijxe'eve'e, mej caí jín rí'i mé teuúmuámua'are'e, ti jeíhua a'ij pua'a tiú'uruure. A'íi pu a'íin pú'een í ti nain tihúa'ari'ira, ti hua'antipua'ajte'esin rusén jime'e.

10 A'iné a'ij pu jetze airáninei naíjmi'i tíj na'a ti a'ij pua'a seijre'e a'ijna jime'e mej huápi'i tumin necua'atze'e. Majta seica, a'íi mú meri ra'atéxiehuataca'a í mej té'atzaahuate'e me'ijna jime'e mej jeíhua huápi'i ranecua'atze'e í tumin. Matí'ij miyen huárini, jeíhua mú rajpuaítzi muá'aju'u.

Tí nu'u tí'itese'e temua'a naa tí'ij raatémua'itin í ti x'í'epi'ín 'een

11 Pajta mú'ee, mi pej rá'astijre'e í Dios, patá'aj caí a'atzu té'aste pe'ijna jime'e sino ayée pepu'u huárini. Patá'aj piyen tiráahuauuni pej urarí'ene'en í a'atzajta'a, pajta patá'aj rí'i tí'ichejca í Dios jemi. Pajta patá'aj té'atzaahuate'e tzáahuati'ira'a jime'e. Ayee pepu'u pajta tiráahuauuni pej huá'axe'eve'e

temua'a naa í teite, pej te'utáviicua'i, pajta ayén huateá'apua'ajte'e mi a'atzajta'a.

12 Patá'aj tí'itese'e temua'a naa pej pi raatémua'itin pe'íjna ti xí'epi'in een a'íjna jime'e pej té'atzaahuat'e. Patá'aj tí'itese'e pe'íjna huatémua'itin pej ruuri puá'ara'ani rusén jime'e í Dios jemi, a'iné a'íj pu jín Dios muaatajé a'ájna xicáara'an pej jetzen raatá'a á'aniuuca meti'iseíraca'a í teite. Xí'epi'in pej raataxájtaca'a pej nu'u ra'ará'astijre'en í tavástar'a jemi.

13 Ayee nu tí'imua'ijcate'e ti'itíj jime'e jemin í Dios ti naijmi'ica hua'atá'aca mej ruuri muá'ara'ani, ajta jemin í Cirístu'u ti ajta i'i Jesús ti ajta xí'epi'in tiu'utaxájtaca'a tí'íj a'ín tí'ixaate'eca'a jemin a'íjna í tajtuhuan ti ayén ántehuaaca'a tíjín Póncio Pilato.

14 Ayee nu tí'imua'ijcate'e pej piyen ra'ará'astijre'en nain jín a'íj nej neri tímuaata'aíj, pej pi caí ti'itíj jín auteáturan, ti ij caí ja'atí ti'itíj jín mú'eetzi jetze te'ujpuá'ajte'en. Patá'aj pauj piyen rijca tíj na'a ti yú auca'ití a'ame asta caí ajtahua'a yé huataseíjre'en í tavástar'a, a'íjna í Jesús ti ajta i'i Cirístu'u.

15 Ajta ayén té'eme tí'íj Dios ayén raaxí'epi'intare'en yee pu'uri raavíjtle ti ajtahua'a huataseíjre'en. Ajta a'ín Dios, a'ii pu a'ín pú'een í tej rí'i tiraatá'aca, í ti ruseíj nain japua tí'ajta. A'íj pu huá'amu'ucán pú'een a'ímej í mej Tajtuhuan jín títeté'u'upu'u. A'ii pu ajta a'ín pú'een í hua'avastara'a a'ímej í tej tiyen hua'atamuá'amua tíjín yee tavástar'a, í mej miyánna seijre'e íiyen chaanaca japua.

16 A'ñ pu'u na'a a'ñn pú'een í ti caí ja'anáj mi'ini, ajta a'ñn pu a'uun á'uca a'u ti ayén jeíhua á'utaaca a'u tej caí a'arájvee í jemin. Capu ja'atí ja'anáj raaseíj, ajta capu ri'irí ti ja'atí rují'i jín raaseíj. Tiché'e rí'i tiraatá'an, ajta ché'e a'ñn nain jín an-tiújmua'aréere á'ara'ani rusén jime'e.

17 Ayee pej tíhua'uta'aíjte'en a'ímej í mej chíjteaani pú'een, í mej yen huachéjme íyen chaanaca japua mej mi caí huá'axieehuata í seica í mej caí a'ij tí'ijviicua'i. Miché'e majta caí me'íjna jín á'ujtzaahuat'e me'íjna jime'e mej jeíhua tí'ijcha'ñ ti huápi'i tí'ijnajche, a'iné capu ri'irí mej ráamua'aree a'ij ti tíhua'atéva'irihua'an méjca'i huáyee. A'íj pu jín, miché'e rá'atzaahuat'e í Díos ti ruxí'evi'ira'a jín taatapuaíjve'esin naijmi'i tíj na'a tej ti te'íjna jín huátatemua'ave'en.

18 Patá'aj tíhua'uta'aíjte'en mej mi miyén huárini í ti i'i xí'epi'ín jime'e, mej mi jeíhua huápi'i miyén tiu'umuári'en me'íjna jime'e ti xí'epi'ín, mej mi ruxí'evi'ira'a jín tíhua'utá'an í mej caí a'ij tí'ijviicua'i, mej mi rá'ujca'ane mej tiu'án temua'a naa a'íjna mej tí'ijcha'ñ.

19 Tí pua'a miyén huárini, jeíhua mú huápi'i raté'avaata í Díos jemi ti tíhua'atéva'irihua'an méjca'i huáyee rusén jime'e. Ayee mú miyén huarín, a'ñ mú xaa ramua'aréeren mej me'uun te'enteárute í Díos jemi mej mi ruuri muá'ara'ani rusén jime'e. A'ii pu a'ñn pú'een í ti tíhua'atéva'irihua'an tzíte'e.

Jíme'en í ti ra'antipuá'ari

20 Mú'ee, mi pej i'i Timoteo, patá'aj rí'i pena'a pej pi nain jín te'ará'asten Díos ti jíme'en timua'íjca.

Capej a'atzu rá'aste í mej jeíhua tiú'ujxajtave'e me'íjna jíme'e í niuucari tí caí tí'itíj vaire'e, ajta tí seicié 'een. Ayee mú té'ujtzaahuante mej tírú'umua'aree, aru capu ayén tí'ayajna. Camu a'atzu rú'umua'aree.

²¹ Majta seica meri huá'unamuajri'i. Ayee mú jín huarín, matí'ij mí me'ín ca'anacan ya'uhuá'axi í mej té'atzaahuante'e. Aj mú mí ajtacíj í tavástar'a jemi, micu. Yee pu i cu. Ché'e a'ij tí'imuavaire'e.

**I niuucari ti jejcua, ti ajta jime'en ra'axa
a'ijna i tavastara'a, i Ciriistu'u ti ji'i Jesús ti
tu'irájtuaa**

**New Testament in Cora, El Nayar Presidio De Los
Reyes; crn (MX:crn:Cora, El Nayar)**

copyright © 2008 Wycliffe Bible Translators, Inc.

Language: Cora, El Nayar

Translation by: Wycliffe Bible Translators, Inc.

Cora, Presidio de los Reyes [crn], Mexico

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cora, El Nayar

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

10f6cd13-ea38-5c62-beee-25cf942ce3aa